

林宗源：人講你是一條蕃薯

(桃紅字：表聲音內容)

人講你是一條蕃薯
破開有黃色的肉
流著白白的血 kiu 佇土內
佇土頂開著連鞭會謝的花咧活
無愛日頭愛月娘豈有影咧
就是共你煮 煎 炆
甚至絞碎也不出手
有一點點仔的土及水
就 beh 瘦瘦仔大
有影無？

你的肉真甜
你的身價真粗俗
你予人坵佇土內
無意志也無想 beh 走出土孔
就是共你生食一半
你猶是會活 會大 會笑
你也無想 beh 反抗
干乾會曉怨嘆命運
流著白白的目屎
哮無聲音
你是不是咧哭？

人講你是一條蕃薯
破開有黃色的肉
假使你會流出紅紅的血
你的心也會變紅
你就會開芳花結恁的夢
無驚日頭無愛月娘
敢倚站你的土地揚眉吐氣

你是不是蕃薯
人講你是蕃薯
干乾會曉叩頭
互相爭 beh 活較大條
大條去予人人咬你一嘴的蕃薯
無土也會亂生根的蕃薯

去死
去死